




祭輓彙錄卷七

祭文

維

康熙五十五年歲次丙申四月庚寅朔越三日壬辰
武夷殿纂修官儀真縣儒學訓導署揚州府儒學教授加一級年家眷晚生顧藹吉謹以清酌庶羞之儀致祭於

皇清誥封光祿大夫內閣中書加十二級耐菴項太老
先生之靈曰嗚呼維公令名時之所仰譽傳萬口
同聲合響夙昔願見僅託遙想真州分教獲奉几
杖清言是接耳豁心爽酌我杯酒坐我書幌名蹟



名輿真金卷一
千卷從容六賞於茲三載無間還往賢子伯仲文
苑連聲遊學吾郡筆軋霄崢一時群彥倒屣將迎
論交在昔風雨寄情廿年契濶此焉合并通門維
舊執禮隨竹老成在望常見典型詎知棟梁一朝
遽傾猶憶見公廷尉使院行步微艱需藥以援因
乞驗方療治頗善旋遊故山登臨不倦松柏之姿
小疾何忌忍自冬春伏枕展轉倉扁束手纏綠蔓
延遂爾永離長夜弗旦把公詩句嗚咽沾巾罷吟
花月虛此令晨玩公遺墨畫鍊鈎銀名牋九萬案
几空陳魂兮何返滌溪之濱書堂三面水石粼粼
宗祠祖墓低徊逡循招之不歸泉路無垠嗟彼皓

蒼視何漠漠不留碩果迎風斯落棘人藥藥泣具
行略讀者起嘆耆德維焯有美必遵砥節匪薄生
今之世於古無忤鐫銘幽石誰與述作可無媿辭
千秋的曠大德有後克熾克昌或升於

朝班居望郎或持身節弼教巡方榮親有典

王命是將階登上爵紫泥煌煌或貢成均刷羽高翔濟
濟蘭玉孫曾成行孝友之報降福孔穰應享大年
期頤未至臬肯憇遺嗟惜不置振振公族飲泣相
視媵尚同哀朋來涕泗勿問疏遠無分童稚依依
戀仁厥感有自識之耳目結之心志聞公之歿罔
弗悲思藹承凶問中心慙而相見恨晚痛不可追

人亡物在苦無見期徘徊邗上風物迷離實有於
豆實酒於卮肴潔酒清哭奠靈帷文以敘哀直摠
我思詞愧不工靈其鑒之嗚呼哀哉尚

饗

維

康熙五十五年歲次丙申四月庚寅朔越祭日乙
未年家眷弟胡繩聖唐鏞謹以辨香束帛之儀致
祭於

皇清誥封光祿大夫內閣中書加十二級景翁項太老
先生之靈曰嗚呼天下無足重輕之人可以一日
不生天下群相倚毗之人斷不可一日以死若太
翁者正群相倚毗之人也何遽溘然而長逝也耶
太翁毓秀芟山幼負英敏之姿漁獵丘墳鼓吹經
籍有大志不屑為雕蟲技及壯挾策維揚兩淮遂
奉爲山斗焉嘗考我朝賦額惟鹺稅甲天下

聖天子時加意而後先督理者率皆正誼明道有董相
風以故數十年來轉輸日益盛而其間審量時宜
斟酌利弊出一心之妙用以左右當事者則太翁
之力為多旨者魚鹽中類多王佐才達則霖雨天
下太翁非其儔耶太翁生平重友誼一時名公鉅
卿爭相折節皆以登龍門為幸蓋太翁之光霽若
茂叔渾璞浩巨源故望重朝野如此且夫人生大
節惟孝與慈孝莫大於慰先靈慈莫大於繼絕世
太翁以宗祊合饗為報本之要不惜捐貲盈萬修
葺舊址締造新基迄今廟貌煥然孰如其孝耶而
又懷羊舌之仁慕邨成之德訪姻婭之近宗續本

支之墜緒孰如其慈耶至於修講堂葺鄉校歸侵
地雪覆盆皆嘖嘖人口則又仁之至義之盡不賴
勇而裕如者也是太翁一生齷運恃以為紀綱朝
野奉以為矜式人倫藉以為標準儕俗賴以為幟
幟何遽溢然而長逝耶雖然太翁年逾杖國壽不
可謂不永矣生當時而有聞沒後世而有傳名不
可謂不榮矣諸蘭玉或值薇省或典外郡或蜚聲
藝苑要皆岷朝楨幹行見黼黻

皇猷勲垂竹帛榮題華表指日可俟太翁亦可含笑於
九京矣繩聖等司鐸平山素叨清誨一旦典型凋
謝倚毗失人能不對總幃而潸然出涕耶敬奠一

觴恭迓雲土千鑒茲微忱而乘風來格乎哀哉尚
饗

維

康熙五十五年歲次丙申四月庚寅朔越祭日癸
巳江南揚州府儀真縣儒學署教諭事舉人加一
級年家眷晚生盛安義謹以香楮束帛之儀致祭
於

皇清誥封光祿大夫內閣中書加十二級景翁項老先
生之靈曰嗚呼古調輟絃少微掩曜天不憖遺人
則胥悼有焯明靈家寶國華價高白璧氣鬱青霞
旣負殊資早承華蔭天路雲衢方期接軫昂霄架
壑譬若巨材宜爲榱桷構彼雲臺拖紫紆青視猶
芥拾何期荆璞終傷卞泣會當家落何以娛親南

陔愛日結念維殷乃息名心治生是急三釜之養
率能致力公之孝友人無間言百城畫像太守旌
門賦述先風詩陳祖德載擴崇基有光奕葉合饗
有祠瞻族有田水源木本三致意焉滌溪學舍先
世所構公後緝之訓迪俊秀山水暴漲人患淪胥
公作隄防永奠厥居凡所設施事皆邁古曾智
囊人稱義府維時鹺筴壅滯方淡公爲區畫實藉

權衡恭逢

鑾輅時巡淮甸草奏指陳

御覽稱善

殊恩滂沛借帑緩征積困以紓衆業寢興
如日測圭如車任輓群情依毗惟此賢哲積善餘

慶佑啓後人鳳毛犀角佩玉垂紳

錫命煌煌袞衣一品里有鳴珂堂真畫錦優游晚節悅

豫且康輔嗣談易郭象注莊漢墨臨池擊盃高唱
筆陣張軍尚推老將胡爲厭世遽返蓉城邦人庶
士咸慟者戍義戢影寒氈光分東壁每以遊從屢
叨教益矧與哲嗣交附同聲孝子樂棘愈傷我情
嗚呼史書存義傳著耆舊公有令名庶幾不朽爰
雞絮酒侑以此詞靈其鑒格尚異歆之嗚呼尚

饗

維

康熙五十五年歲次丙申孟夏四月庚寅朔越宜祭之辰年家眷教弟王茂栢謹以剛鬣柔毛清酌庶品之儀致祭於

皇清誥封光祿大夫內閣中書加十二級景翁項老年臺老先生之靈而言曰嗚呼死生命也哀泣情也豈能漠然口乎此猶以恒情論也抑或豐於此而嗇於彼得共偏而未獲其全未免有不足之悲若夫身膺腴厚壽幾大耋子孫林立則五福之內兼而有之固斯世不多有之人不多覩之境又何沾沾焉涕泗爲耶獨是老成凋謝懿範云亡凡屬知

交亦爲之咨嗟太息而况柏莅任茲土素忝相愛能不歔歔臨文極其不忍相忘之致焉邈我太翁新安望族遙遙華胄由來舊矣幼而倜儻長而建竒居平事兩尊人當其生也晨昏定省無不先意承志迨終天之後喪葬旣備報祀必虔其孝也如此宗支族黨弟兄猶子不以遠邇異其愛戚屬親誼閭里童叟不以親疏弛其惠其婣睦任卹有如此至於交遊則然諾必慎所與無苟凡兩淮賢士往來當事無不折節下交而咨詢利弊焉其信義也又如此而天有不永其年者乎有不昌其後者乎翁壽將大耋不爲不壽矣佳嗣滿庭爲盛世竒

英取

綸封而褒美正未可量也此固所謂斯世不多有之人不多覲之境而又何有遺憾乎惟是柏久忝殷愛時懷好德報稱無由今乃覩茲永逝能無稱述高厚以表章於萬一耶寸忱敬奠惟靈昭格鑒而歆之尚

饗

維
康熙五十五年歲次丙申夏四月朔越祭日丁酉
之辰年家眷弟茹鈺張國弼謹以剛鬣柔毛清酌
庶饗之儀致祭於

皇清誥封光祿大夫內閣中書加十二級景翁項太翁
之靈而言曰於戲太翁川岳之質廊廟之英如圭
如璧如錫如金陵松柏之蒼堅傷金石之崢嶸嗚
呼太翁幼而穎異芸窗風雨家學相承長而敦敏
博文強識鄉黨攸欽遠跋涉以從事幸砥礪而學
成念高堂之垂暮率愛日之天真溫清定省極甘
旨之畢備蒸嘗祀禴悲几鬯之徒陳至於整修先

祭韓宣公文
墓繕葺宗祠營力作而百工就食築石堤而千室
咸寧以致惠洽三宗恩施九族此固表炳乎塵寰
實皆楷模夫後人以故海內名公鉅卿折節下交
諮諏訪問定當事知有太翁矣

翠華南幸得覲

天顏頒賜

御書克食是

聖天子知有太翁矣若夫冢君特達馳譽薇省秩滿遷
喬不次榮膺次君奮發佐郡延安課政報最嘉績
書屏伯仲濟美群季輝映此令嗣勲業之隆實太
翁庭訓之成且也孫枝挺立玉樹森森堦蘭庭桂

繩繩振振群英繼起霞蔚雲蒸洵家庭之咸備實
盛德之釀成斯耆英之共則為洛社之芳稱朱衣
袞繡祿享無限胡天不弔遽奪仁人嗚呼哀哉哲
人云亡兮遐邇涕零昊天色黯兮南極星沉晨風
慘悽兮皓魄光淪仰高山而無從兮將後人何自
以景行嗚呼哀哉鉅等濫廁名邦謬叨交末忽聞
訃報悲惋填膺望几筵之縹緲盼靈爽之俯臨奠
魯酒以一樽期來格而來歆尚

饗

維

康熙五十五年歲次丙申夏四月庚寅朔越三日
壬辰宜祭之辰江南揚州府以州同署江都縣丞
事加紀錄一次年家眷弟祝聖傳謹以剛鬣柔毛
清酌庶饌之儀致祭於

皇清誥封光祿大夫內閣中書加十二級景翁項太封
翁之靈曰嗚呼嘗觀洪範之第九疇也終申之以
五福天下之能備五福者豈易多覲哉蓋天之錫
人也以福而人之邀天眷也以德未有德不立而
福可倖致者如太封翁之福德兼隆則積之厚者
發必光源之遠者流自長所謂天授非人力之可

強獲也而一旦變徵鵬鳥星隕少微使哲人長往
典型失墜嗚呼傷矣太封翁為天都世胄生而穎
敏稍長遊學武林受業於宿儒之門學成出試輒
傾其曹既而念兩大人春秋已高奉養宜急遂棄
舉子業治鹺維揚家道日隆隆以起迎養兩大人
先意承旨曲盡子職此太翁之孝宜邀天眷而獲
福者也同堂昆季十餘人太封翁各極友愛始終
無間遇有婚喪大故不憚竭力周全以敦一本此
太封翁之悌宜邀天眷而獲福者也兩淮為財賦
淵藪太封翁經理其間歷數十年凡利弊所在無
不條分縷析興革損益動合機宜當事重其老成

欽其謀畫而其實公爾忘私不為一身一家之計
此又太封翁之忠宜邀天眷而獲福者也生平交
游極廣即鹽筴共事諸公亦指不勝屈太封翁無
論貧富貴賤一以誠慤不欺為本四方冠蓋雲集
咸願折節約交恨相見之晚此又太封翁之信宜
邀天眷而獲福者也他如濟人利物則服其仁慷
慨任俠則服其義明事見幾則服其智見善必為
則服其勇此又全德之發見而為獲福於天之所
由來也夫以太封翁之德如是實為斯世斯人之
所倚賴倏焉乘鯨駕鶴逍遙於蓬壺閬苑之間在
太封翁自視生順死歸了無遺憾而自今以往求

如太封翁之德而卒難復見宜閭里之中停春罷社歎息於昊天不弔也乎然以太封翁之獲福於天歷數其驗則年踰古稀者壽也家累素封者富也精神強健身無遘疾者康寧也好善樂道心逸日休者攸好德也存順歿寧體受歸全者考終命也以洪範所陳之五福悉能備之於一身則太封翁之所得於天者不為不厚而德之馨聞且可長存而不朽矣况乎受

天朝之華袞則榮封三世晉階一品享子孫之美報則視草薇垣宣力方伯將來沐

聖主之知建功立業為斯世斯人之所倚賴者正未有

艾而太封翁垂裕之美不尤幸箕裘之克紹也哉傳以風塵末吏待罪茲土耳熟太封翁之德福兼隆敬陳一奠而縷述之庶其來鑒吾忱而來格乎嗚呼尚

饗

維

康熙五十五年歲次丙申夏四月庚寅朔越祭日
丁酉之辰承德郎六品筆帖式授江南揚州府儀
真縣縣丞加一級年家晚生金玠謹以剛鬣柔毛
清酌庶饗之儀致祭於

皇清誥封光祿大夫內閣中書加十二級景翁項太翁
老先生之靈曰嗚呼惟天錫福而天道每有不齊
惟人立德而人事恒多可議此古今來福全德備
自始至終毫髮無遺憾者不數數覯也其惟我太
翁乎玠少時從家君佐理揚郡太翁與家君稱莫
逆交情誼甚洽家君公事之暇輒舉太翁懿行相

示心私慕之而一見無由迨玆佐茲邑郡城之隔
又不得時親太翁爲歎幸令嗣次君書存先生居
儀不鄙菲才謬承契合竊窺其志行言論皆加人
一等真不愧爲太翁令子平日歉懷可以一慰由
是世好愈篤佩服太翁匪朝伊夕矣癸巳秋太翁
七旬初度玆隨諸士大夫後奉觴上壽太翁舉止
矍鑠風神健旺同有無疆之慶今何一旦跨鶴雲
間騎箕天上耶能無恫哉然觀於天道人事則洵
有可以無恫焉者天之錫福榮壽子孫能全者少
人之立德學行事功能備者希試問太翁有不全
之福不備之德乎無有也太翁少負白眉之美譽

長標赤幟於文壇因釋卷而奉高堂爰挾策以居
邗水五十年來上臺皆推爲領袖兩淮久恃若長
城太翁矜詡不形公私畢舉受

聖主之知借帑裕供商困旋起光祖宗之澤四世一品
贈階斯隆惠溥於姻黨夙有仁人之稱義播於朋儕不
忝長者之目一時善事千秋佳話更僕莫能數而
情逸才起或敲句或作字遠追唐宋名賢又儼然
儒者風流非徒以陶朱猗頓自雄者比太翁誠無
不備之德也宜乎

九重眷顧特賜金章玉食

恩榮一品顯赫已極且仁者之年自永朱顏白髮遐踰

古稀積善之後必昌桂子蘭孫俱稱英俊令嗣長
君經士先生才同班馬文並王唐薇省清高群仰
雅望次君書存先生學可匡時品堪風世符分上
郡雄邊賴以綏寧秩晉監司偉烈行看建樹至於
叔季兩子翁悉負弘才暨夫孫曾諸世兄均擅異
質非太翁修身善教何以至此他日聯翩飛騰奮
跡

王路繼續太翁之業而擴大之正未有艾太翁壽考令
終胸無一事福又詎有不全者哉嗚呼太翁福全
矣德備矣天道之有不齊人事之有可議者至太
翁而無不齊無可議矣由是觀之夫復何恫而孔
饗

企仰之念交好之情則又不能已於恫焉敬具薄
奠虔伸鄙悃神其賜鑒來格來歆嗚呼哀哉尚

饗

維

康熙五十五年歲次丙申夏四月庚寅朔越祭日
壬辰江南淮安府檢校加一級金鑄謹以辦香束
帛清酌庶品之儀致祭於

皇清誥封光祿大夫內閣中書加十二級景翁項老年
臺老先生之靈而言曰嗚呼人生天地一逆旅耳
其生也榮沒則已焉大抵然也惟古今仁賢君子
衆所係屬於死生之際無論親疎遠近聞其訃者
莫不感悼欷歔極其不忍相忘之致焉今又於我
太翁見之已翁當弱冠時即卓犖不群昏定晨省
孝成天性傳之於鄉里者素矣及長而好學詩書

之氣溢人眉宇道德文章可欽可範公卿大夫往往稱道於勿衰凡族姓之微薄者分金以睦之鄉黨之寒素者厚惠以周之瘞骨為旅魂之主給乳為幼稚之謀以至施藥救人捐金賑粥烟波魚艇之會流離患難之中荷生全而戴德澤者不可枚舉翁之行事與翁之生平固已敬之慕之方期其享大年食天之報無窮期矣夫何一疾竟去人世也耶則曩昔敬之慕之者不禁為之潛然泣下而不能已也嗟乎尚復何言哉雖然人所可必得者壽也所不可必得者德與名也苟無德無名雖生猶死耳若翁之盛德著於家邦令名播於遐邇則

雖死之日猶生之年况乎令嗣諸君玉樹琳瑯皆咄咄逼人其光大於名門為翁厚德之報者正未有艾翁雖不能含笑於一堂亦可瞑目於九京矣獨是哲人云亡典型難再瞻杖履之徒存慨音容之間隔歎息遍於閭閻哀恫符於疏逖草木為之含悲風雨為之失色鑿蒞任淮陰忝列蘭譜之誼有不為之涕泗交橫者乎嗚呼生芻一束敬展哀思太翁有靈來格來歆尚

饗

維

康熙五十五年歲次丙申四月庚寅朔越祭日丁酉之辰江南揚州府江都縣以州同管主簿事加一級紀錄二次年家眷晚生仇帝臣謹以剛鬣柔毛清酌庶品之儀致祭於

皇清誥封光祿大夫內閣中書加十二級景翁太老先生之靈曰嗚呼人謂今人遠不逮古人晚於太翁之生平而竊信其不然也太翁世系分自雍隴逮著籍歛南而後代有偉人遂為江南右族至太翁業齟維揚以來亦有年所四方之名公鉅卿莫不慕太翁之為人其曾親炙懿範者往往於宦遊邂

名軒字金一
近間輒爲稱道弗衰晚往歲效力河干已久耳太
翁名但締交無自不得一接眉宇心甚憾之癸巳
量移江都於簿書鞅掌之餘以公事會揚之士大
夫始獲快覩芳型時親色笑見其溫恭雅飭慷慨
慈惠大有古風竊心儀久之退而深咨其梗槩知
其事親也愛敬兼至無異柳公仲郢其待諸昆季
也友恭性生無異溫公司馬其敬宗睦族善承先
志也周且悉無異文正公范其燕翼詒謀施及後
人也正而大無異萬石公石其他交友以誠則無
愧古人之信也急公事上則無愧古人之忠也輕
財樂予則無愧古人之義也憫窮卹患則無愧古

人之仁也太翁殆不可以近今之賢目之矣又孰
謂古今人之不相及哉晚方幸楷模之有自企表
準之非遙詎意倏忽之間嘆哲人之旣萎痛老成
之不再耶雖然天之報太翁亦不薄矣嗣君悉膺
簡命孫曾盡屬芝蘭行見寵眷頻加簪纓奕禩德光史
冊名震江南太翁固可含笑於九京矣晚未免有
情能不歔歔泣下耶敬陳薄獻寄奠几筵靈其不
昧來格來歆哀哉尚

饗

維

康熙五十五年歲次丙申孟夏月庚寅朔越祭日
乙未之辰江南揚州府儀真縣典史傅築謹以剛
鬣柔毛辦香束帛清酌庶饗之儀致祭於

皇清誥封光祿大夫內閣中書加十二級景翁項太翁
先生之靈曰嗚呼人固有名滿天下而鄉曲不無
間言行榮一時而身後反生遺憾無他習近則真
論久乃定蓋至間言多有而其所為名者可知也
遺議煩興而其所為行者又可知也若我太翁之
聲名重望嘉言懿行美足多焉太翁生而異慧性
嗜詩書博聞廣記卓越等倫以長才而置身仕籍

則理繁治劇恢恢乎錢穀與兵刑以藻思而執耳
文壇則千夫辟易揮毫落紙更馳驟而縱橫心性
之內惟以天倫爲重克盡奉親之道而孝思惓惓
此根本固敦矣迨持籌馭政區畫精詳經濟超衆
兩淮推爲祭酒倚爲金湯以故名公卿士無不聞
風嚮慕欽心折服

翠華南幸邀

九重之顧問又頒賜

宸翰恩遇非常豈人生所易得之盛遇乎正宜上臻期
頤何一旦竟棄捐人世聞者靡不流連涕洟以不
得復見爲謳思嗚呼斯豈作而致之歟良以潛德

幽光積之有素不求聞而人聞不求見而人見築
未臨真邑早知太翁名滿寰區想望維殷忝贊真
江獲與嗣君書翁先生接教叨誨而被益者良非
淺鮮方期一晤太翁以遂見荆之願正自有日何
太翁竟赴修文之召而使築徒對總帳而空攀也
耶嗚呼悲哉雖然太翁壽踰古稀生有榮名死無
遺憾諸嗣君先生爲

朝家之柱石俱各顯揚當世蘭孫濟濟悉成玉堂金馬
之質

寵錫馳封光賁泉壤者正自靡限太翁亦可逍遙於十
洲三島間矣生芻一束薦此哀忱神其鑒茲來格

來歆尚

饗

維

康熙五十五年歲次丙申夏四月庚寅朔越祭日
壬辰江南揚州府江都縣督捕廳加二級年家眷
晚生顧嘉諒謹以剛鬣柔毛清酌庶品之儀致祭
於

皇清誥封光祿大夫內閣中書加十二級景翁項老年
臺老先生之靈曰嗚呼今人於交際間當其存也
則習而不覺及其歿也必歷溯其生平之遇與其
行事而咨嗟歎息之大抵悲憤之辭居多若夫膺
富貴享大年子孫繩繩皆賢且能其於生人之遇
良有厚幸宜若可以無戚矣而凡屬交游猶不免

於咨嗟歎息焉則其人有所使之不忘也翁以新安望族善行多端少有才畧能文章試輒冠軍長思養親客維揚精鹺策家業日益起至今獲顯名而號素封者必首舉翁以對其有厚幸者一年登上壽綱紀兩淮議論因革有補鹺政而爲當代所推重者垂五十餘載且素性儉勤衣食不過豐間有餘暇則習鍾王點畫摩李杜珠璣風晨月夕陶情詩酒吐辭風雅絕無俗韻其有厚幸者二諸嗣君或食餼歲薦涖紫薇省或出授郡丞優理煩劇皆卓然人望爲儒林之翹楚子復有子孫復有子鸞停鵠峙不僅如荀龍之數直將與汾陽媲美亦

極盛矣而庭除尤以色養聞歲時伏臘率其婦子承歡膝前翁顧而樂之其有厚幸者三嗚呼古今不乏傳人而能無戚於生人之遇者不數見即以富貴之家論或能富貴矣而未必享大年或享大年矣而子孫未必蕃衍即子孫蕃衍矣亦未必積習名教赫赫一時令人服其賢且能惟翁克兼之其得於天者不誠有厚幸哉惟其得於天者有厚幸故無所憂於生前亦無所憾於身後矣諒涖任邗江幸叨蘭契敬藉醴蔬告於靈前亦聊以自表其悽懷焉耳尚

饗

維

康熙五十五年歲次丙申四月庚寅朔越祭日甲
午江南直隸滁州全椒縣典史孟士毅謹以牲醴
束帛之儀致祭於

皇清誥封光祿大夫內閣中書加十二級景翁項太老
先生大人之靈曰嗚呼公居淮海名德自高走以
委吏作尉全椒地之相去數百里遙公之氣宇如
天上景星不可得而覩公之膏澤若楚子餘波必
及於鄰國全有寓公獲交羅君牢之似舅為公賢
甥高館張燈長筵鬪酒暇日遊從情深意厚述公
風義為世領袖積之於心誦之在口困於簿領末

由造請寤寐之懷恒依門屏間通奏記奉公起居
恭承嘉惠憫我窮魚歲在昭陽時惟白藏日躔壽
星之次筵開畫錦之堂聞公初承

錫命披一品之衣始登杖國稱七袞之觴公之公子皆
豐貂華綬褊襩進舞公之孫曾多謝蘭却桂胸臆
成行列郡纓綉莫不奉觴而上壽而走一介猥賤
亦得遙祝其無疆方將添億萬之籌以齊海屋綿
八千之算以竝椿齡何日月之易邁傷者舊之凋
零人之仰之庇之者咸以為失所倚恃而如痛所
親也固已臨哀而聚哭而走思之慕之者終不獲
親炙休光而遽成千古也亦復震魄而摧心嗚呼

公之德行文學公卿誄之公之官闕才猷誌狀詳
之走固側陋何以文為曾不敢齎三尺緹素陳哀
輓之詞今茲所敘第摭其景行之願與感霑旣之
私薦以時羞酌以清醴異公神之如在尚式鑒而
歆之嗚呼尚

饗

祭輓彙錄卷七

祭輓彙錄卷八

祭文

維

康熙五十五年歲次丙申夏四月庚寅朔越七日
丙申兩淮都轉運鹽使司通州分司掘港場鹽課
司大使加一級馮啓隆謹以剛鬣柔毛清酌庶品
之儀致祭於

皇清誥封光祿大夫內閣中書加十二級景翁項太封
翁老先生之靈曰嗚呼夫世之巨公碩彥仰之如
日星河嶽若不可躋而升及其即之也藹然芝蘭
之秀珠玉之溫斯非包涵萬有發越肆應何以致

人心之愛敬歷久而彌新太翁以恢弘卓犖之才
出自簪纓閥閱之家幼負聰穎自孩提而目爲大
器弱冠而執經於名宿累試而輒冠軍念高堂二
人之並老坐缺供養而非子職之心爰棄呶唔挾
策而遊於邗水之濱慨齎務之日頽雖有志而難
施即多才而何濟太翁洞晰源流中外不憚於指
陳瞭列省宇條分縷析推柱石於利弊革因所以
視齟上憲未下車而知其名既涖任而諮諏惟勤
四方名公鉅卿傾慕心折罔不造廬而歡若平生
江南江北之重地我

皇上之洞燭商困太翁不憚戰慄以陳情減勛貸帑

俞允帶徵兩淮數百餘家皆倚太翁爲齟業之長城隆
以樗櫟庸材備員海濱每過郡城而覲芝眉春風
和藹出於天真不第飲食教誨以承旨尤指示津
要而被德沾恩初聞太翁之違和隆方異勿藥而
愈無何遽聞棄世而長征太翁視一族而猶如同
胞凡飢寒困苦皆賴以舉火婚嫁喪葬亦盡爲經
營太翁之德業嶽峙川停太翁之文章玉振金聲
若夫荷

宸眷之優渥賚予之重疊尤爲曠代之殊榮太翁所不
留者浮雲之富貴與浮生之歲月所常留者千秋
百世之大名太翁之哲嗣冠裳方接武於簪纓伯

仲身登於廊廟叔季幟樹於儒林孫枝多士或望
重齟筮或學富史經薛鳳荀龍皆不足以擬其倫
獨隆向日之奉令承教何今茲素衣執紼以哀吟
祇臨風而酹酒望江流之蒼漭山勢之崢嶸太翁
何依而何憑嗚呼哀哉尚
饗

維

康熙五十五年歲次丙申四月庚寅朔越祭日丁
酉江南揚州府儀真縣稅課局大使鄒錫印謹以
剛鬣柔毛清酌庶羞之儀致祭於

皇清誥封光祿大夫內閣中書加十二級景翁項太老
先生之靈曰嗚呼元化渾噩氣磅礴些經以象曜
麗昭融些緯以岳瀆載扶輿些惟賢曜質參兩為
三些受氣之清賦體之厚些蘊為材美如芝箭些
發為符采若球璧些得時則駕任重遠些履道而
行筮貞吉些仁以宅衷純以粹些義以幹事貞且
固些禮以自守嚴防閑些智以見幾懸璣鏡些信

以服衆孚豚魚些
皤皤黃髮爲國紀些
吉人藹藹樹世範些
推公之系肇姬牒些
賜國受姓歷千禩些
世有勛華銘鼎卣些
遷於天都稱巨闕些
幹彊枝繁蔭四國些
公起承之益光昌些
奉先之孝擴堂構些
裕後之善昭燕翼些
麟趾振振衍公族之
慶些
鳳毛奕奕耀盛世之儀些
入贊密勿冠華選些
出領藩條沛膏澤些
三釜致養宜悅豫些

紫綽馳封齊公僚些
耆德彌劬天所佑些
神明方懋壽無疆些
何意金刀忽掩鉉些
東隅方升濛汜入些
昔昔華屋今山丘些
歸全得正公何憾些
懷仁慕義人孔戚些
生而爲哲沒爲靈些
公有遺澤被穹壤些
公有令名宣金石些
言念疇昔奉遊好些
載瞻旂旒感徂落些
薦以蘭羞酌桂醕些
攄我私誠吟是哀些
維公式鑒尚歆享些
嗚呼尚

饗

維

康熙五十五年歲次丙申孟夏月庚寅朔越祭日
乙未之辰江南揚州府稅課司署儀真縣舊江司
巡檢錢天錫謹以剛鬣柔毛清酌庶品之儀致祭
於

皇清誥封光祿大夫內閣中書加十二級景翁太先生
之靈曰嗚呼惟哲人之誕降兮秉岐嶷於性生少
篤學而博覽兮發情志於典墳本新安之世胄兮
疊簪纓之清貞淵源之有自兮嗣書香而有成即
卓絕乎人群兮乃蜚聲於成均廣交遊於四方兮
僉謂叨公惠之醇似劉真長之溫潤兮如郭有道

之澄泓敦孝友於一室兮復何慚於天倫樂詩書
之萬卷兮多貽澤於後昆羨瓊珠之奪目兮喜玉
樹之森森公好德其不倦兮每卹困而賙貧拯飢
寒之危急兮解重橐而捐金恩膏遍於道路兮口
碑盡出於人心能持籌於鹺政兮兩淮奉為懿型
邀

九重之恩榮兮顧問之殷殷

寵錫之疊頒兮

御書克食之優隆正宜上享期頤兮何遽駕而棄塵音
容其難在今令人心愴而黯神梁摧而棟折兮感
聚散於德星典型頓失兮不知其淚之泫泫生既

無愧兮沒有餘馨諸嗣君之揚名宇內兮誰與比
倫待指日以升華兮聲傳

帝庭蘭孫之挺秀兮竚覩奮翮於雲衢太翁雖歿猶存
兮可逍遙於蓬瀛錫叨沐恩光兮感銘寸忱謹獻
一卮兮神其來歆嗚呼尚

饗

維

康熙五十五年歲次丙申四月庚寅朔越祭日癸巳儒林郎監理河務同知兼攝江南揚州府儀真縣清江閘事年家眷晚生時書謹以剛鬣柔毛清醴束帛之儀致祭於

皇清誥封光祿大夫內閣中書加十二級景翁項老先生之靈曰嗚呼周禮大司徒之言六行者曰孝友也曰婣睦也曰任卹也是六行者猶象曜之經天岳瀆之緯地也凡厥生民秉其義也公潔白致養孺慕終身孝之至也少而推黎長而讓產友之至也河潤九里澤及九族是婣睦也是任卹也六行

祭軒冕錄卷八
咸修懋彝倫也翳此吉士國之紀也民之宗也公
之待人猶巨壑之納川流也人之倚公猶行車之
任輓軌也其生也榮羔雁盈門若五府之辟太丘
也其死也哀緦經聚哭若列郡之會林宗也公侯
子孫復其始也燕翼詒謀昌爾世也鸞臺鳳閣掌
制誥也繡衣薦節宣藩條也濟濟象賢守庭訓也

煌煌

錫命躋公僚也尸而祝之同庚桑也社而祭之比樂公
也乘運而來乘化而歸公無憾也大業既立令名
孔彰公不朽也書夙欽矩範幸奉教也轍中涸鮒
被濡沫也車下勞薪辱憫恤也何天不弔嗟靈光

之隕落也懷仁慕義不覺涕泗之交頤也牲之輸
也酒之醺也筐筥錡釜之器澗溪沼沚之毛也恭
修薄奠摠其誠也侑以此詞寫我心也長跼几筵
載瞻旂旒念儀容之如在而馨歎不可以聞矣靈
和不昧異式鑒而歆之也嗚呼尚

饗

維

康熙五十五年歲次丙申四月庚寅朔越祭日甲
午江南江北揚州營左哨千總加一級龔天瑞右
哨千總加一級陶祝左哨頭司把總加一級蔣應
豹左哨二司把總加一級孟朝黻右哨頭司把總
加一級林存右哨二司把總加一級賀宗誠謹以
辦香束帛清酌庶羞之儀致祭於

皇清誥封光祿大夫內閣中書加十二級景翁項太封
翁之靈曰嗚呼挾貲而埒卓鄭好義而邁原嘗澤
及九族名傾四方生爲人所倚歿而人不忘斯固
間代之賢杰足垂奕禩之聲光有焯明公休哉芳

軌儀見英偉則楨幹百尋才氣飛揚則騏驥千里
佩觿而陳三篋即號書倉加冠而張一軍早摩文
壘何難獵取夫科名自可芥拾乎青紫顧情殷於
愛日獨念切於娛親養志旣酬於鍾釜承顏靡間
於昏晨居廬之日肉常弗御旣祥之後琴不成聲
神魚爲之出水靈芝爲之產楹州閭稱其純行皇
祚格其精誠推而報祖則匕鬯告虔四時獻灌推
而睦親則贍恤必周千室待饗或射書急下解聊
城之圍或輟饕即行赴南陽之難道逢越石恒脫
晏子之驂時遇翳桑多給趙卿之飯此皆推廣其
深仁故能兼該夫衆善至若穆之尺牘君卿筆舌

言泉沛而川流思風扇而颺發分庭抗禮八使多
爲改容單騎式廬三公盡能折節甚至挾富國之
籌功高煮海陳通離之奏喜動

垂旒荷天心之洞燭沛膏澤以滂流不特兩淮群推爲
坊表抑且太府深藉其謀猷若夫業有傳經謀貽
燕翼西京以萬石名閭朗陵則八龍會食伯旣鸞
臺視草蘇賈齊名仲亦薦節察廉羊杜媿績雲霄
接武更叔季之翩翩蘭桂駢枝多孫曾之奕奕里
溢鳴珂門高列戟所以

錫命九重光昭曠典袞衣一品貴擬公僚洛社以耆英
望重夔龍以丘壑道高龍馬之精神彌健巖松之

祭軒轅金卷八
氣質後彫何意靈光忽悲夜壑童子長生之藥莫
乞於西山茅君上卿之階仍隸於東岳酒壚重過
忍看滿目河山華表歸來試問何年城郭嗚呼哀
哉瑞等恭承風義曾拜堂皇媿戎旃之微末被惠
愛於殊常羌日月之征邁嗟耆舊之淪亡生芻一
束敢申孺子之弔素車千里咸會林宗之喪嗚呼
人生有涯公名不朽煌煌鉅筆是多有道銘詞藉
藉道途亦有吾儕碑口何必書橋公之征鉞始可
揚休勒晉國之景鐘方堪垂後泣叩几筵肅陳籩
豆奠式鑒於明靈庶來歆夫絮酒嗚呼尚
饗

維

康熙五十五年歲次丙申四月庚寅朔越祭日甲
午年家眷晚生夏儻謹以剛鬣柔毛清醑庶羞之
儀致祭於

皇清誥封光祿大夫內閣中書加十二級景翁項太老
先生之靈曰嗚呼維明靈之誕質稟川岳以耀儀
表神鋒以高峻露犀角而英竒邈遙胄於姬籙衍
封項之分支當典午之南渡有司馬之秉樞卜遂
安而隸籍尋載徙於桂溪迨大魁之對策在宋曆
之淳熙蟬冕聯於廿葉功名勒於鼎彝芝有根爲
瑞草泉有源爲甘醴自我公之繼起承列考之芳

規少即陳夫四庫長更勵夫三餘考魯壁之漆簡
辨魏墳之竹書技七發而穿札文一戰而塞旗駕
長轡而未騁觀遠祚之中衰眷春暉其將暮致鍾
釜以奚時乃棄觚而握策宅維揚以肇基廓三成
之堂構蠹數仞之榱題業隆隆其寢起色怡怡而
孔愉言采蘭而養志補循陔之軼詩推仁孝而追
遠敬宗祖而崇祠修四時之合饗昭百世之永思
以一身為膏澤盡九族而霑濡作人倫之坊表植
世道之網維公府辟以羔鴈州郡奉以盤匱誦先
德兮繩武振後葉兮燕詒毓謝蘭兮竝畹擢燕桂
兮聯枝掌絲綸兮鳳閣建藩服兮隼旗荷

九重之錫命耀一品之袞衣信躬修夫衆善宜天介以
繁禧香山開九老之社淮南結八公之期學偃儂
之導引偕禽向以游嬉何朱顏之難駐悵白日之
易馳靈光墮兮悲夜壑青松黯兮閔泉扉緬依仁
而嚮義皆迸泪以沾衣嗟百身之莫贖指千禩而
詎追媿佩韉之末品亦述哀於蕪詞異明靈之式
鑒庶歆享夫奠卮嗚呼尚

饗

維

康熙五十五年歲次丙申四月庚寅朔越祭日壬辰總督江南江西部院標奇兵營司廳加一級馬國泰謹以剛鬣柔毛清酌庶品之儀致祭於

皇清浩封光祿大夫內閣中書加十二級景翁項太老先生之靈曰嗚呼惟公善為國紀行懋家修休哉芳軌焯矣清猷嗟世之季其風斯偷公為防範敦實去浮譬猶鍼石病者用瘳彝倫攸敘職公之由公孝於親胸膈希鞬有鍾有釜竭甘盡羞哀深霜露誠孚臘臚孺子之慕至耄弗休公亢其宗任卹必周分以宅舍贍以田疇各俾給足無或噢咻由

親及遠情意綢繆公持信義篤於應求季心梁楚
劉弘荊州萬間厦屋千丈大裘巾鞞賁止賓轄爭
投濟川得筏行車倚輶人所依毗有如覆幬公有
經濟小試持籌如懸璣鏡若解霜緱臨事勇決無
少優柔八使折節利弊是諏九府貨泉亦藉嘉謀
通齎伏奏喜動

垂旒家庭之訓媿於太丘子孫繼起炳炳彪彪視草赤
筦擁節青油公膺

封誥殊錫何優提躬之厚荷天之庥公妙詞翰繼響曹
劉公善法書鐵畫銀鈎缶爭藏弄寶若弘球即此
藝事亦絕倫儔古稀之年歲月非道桂樹淮山璠

花玉勾八公延訪九老風流神仙耆舊庶與之侔
吁嗟碩果何不長留羲和促轡夜壑移舟乘化而
歸與天爲遊尚想遺風渺然千秋恭修薄奠潔乃
鬯旨長跼陳詞公其鑒不嗚呼尚

餐

維

康熙五十五年歲次丙申四月乙未江南奇兵營
右司把總加一級趙得功謹以牲醴之儀致祭於
皇清誥封光祿大夫內閣中書加十二級景翁項老先
王之靈曰嗚呼昊天之不弔兮致德曜之潛芒
風淒其而悲咽兮雲黯淡以無光通國哀戚而掩
袂兮族黨涕泣以沾裳矧我夙仰典型於曩昔兮
久叨德教之馨芳茲音容已杳然而莫覩兮儀範
徒索於渺茫故不禁潸然而痛哭兮怒焉切憾夫
彼蒼維我公爲簪纓之胄兮鍾靈秀於川岳旣賦
性而仁慈兮更稟資而卓犖披二酉以搜竒兮閱

五車而富學經濟之才多且弘今謀猷之識深且卓當事共欽仰而引重今謂鹽筴之紀綱非公莫託凡鹺政之興革莫不諮度今良由公才智之炳灼若夫孝友既盡於家庭兮忠信更著於鄉邦敦本而致肅於蒸嘗兮濟困而不吝夫傾囊凡此美行之彰彰兮誠堪與古賢而頡頏宜天報夫碩德兮俾後裔之熾昌或望隆於中翰兮或佐治夫名邦已見超擢之伊邇兮竚看霖雨乎赤蒼公宜膺夫上壽兮胡竟返旆於帝鄉酌椒漿而聊抒悲悃予異靈爽之來嘗哀哉尚

饗

維

康熙五十五年歲次丙申夏四月庚寅朔越祭日宜祀之辰年家眷晚生陳光表厲鎮許蕃呂大周黃暹朱大焜呂大受汪文芷汪文萊蕭長裕洪璿萬志超伍超蔡茂臣汪正鈞蕭長祉吳炆吉汪玉珩黃廷翰李文烜王世偉楊彬馬復張璞曾鳳儀謹以辦香束帛清酌庶品之儀致祭於

皇清誥封光祿大夫內閣中書加十二級景翁老年臺先生之靈曰五更三老邦家之光洛社香山閭里之望何箕尾之忽隕而哲人其云亡緬太翁之誕降接姬德之餘芳秉天都之淑氣鍾地靈而發祥

飲香名於蘭蕙播令範於珪璋學武林而海涵地
負試文壇而鳳耀龍翔池水盡黑師顏柳兮友蘇
黃奚囊皆錦祖漢魏兮禰隋唐比謝傅之疊疊類
叔度之汪汪聊運籌夫鹽策遂建豎以非常匪機
中夫一事乃滙美於衆長周歷憲之咨度齟網舉
而目張每拜疏以入告立搦管而敷揚承

天語之垂問膺

帝賚於下將分大官之玉食沐

宸翰以輝煌至若芹藻荒圯爰鳩庀於膠庠松椒凋瘵
遂輪奐乎祠堂遺像復覲厥祖彌張宏基再闢佑
啓俊良置義田而睦族旣仁惠乎一鄉築長堤以

捍水亦措置之多方憂人憂兮雪冤贖鬻急人急
兮指困捐倉或贈金錢以受室或助麥舟而舉喪
洵諸美之咸備亦何用而不臧表等通家子弟素
切羹牆仰山斗於夙昔稔珠璣而不忘欽典型其
尚在幸奉教於方長胡逍遙以曳杖遂夢覺於炊
梁驚玉樹之埋土痛金刀以掩鋸嗚呼謂天道其
有知宜食報於無疆縱鴻泥其倏去卜鳳羽之熾
昌欣孫枝之秀茁悉寶樹以琳瑯竚

恩榮其疊沛看象笏之盈牀惟德澤仁聞其不朽即蟬
蛻羽化而何傷嗚呼鶻啼蜀道感雲樹之蒼蒼猿
嘯晚風悲江水之茫茫具生芻之一束聊敬佐乎

祭軒輿錄卷八
天漿陳蕪詞而薦酒靈髮髯以來嘗嗚呼哀哉尚
饗

維

康熙五十五年歲次丙申四月庚寅朔越祭日乙
未年家眷弟吳璠丁沂黃侍焦瀛潘帶唐怡年家
眷晚生閔長寧胡琨王棟程以儼朱衣允阮匡衡
圍大杲蔣駮仇之苞王廷然江旻阮玉堂鄭嵩阮
應武吳祁年家眷晚學生羅智張廷彪愚甥張曰
偲謹以辨香束帛清酌庶品之儀致祭於

皇清誥封光祿大夫內閣中書加十二級景翁項老年
親臺之靈曰嗚呼翁之生也七十有三年其與我
輩交也四十有餘載德醇而道茂才大而學優嘉
言懿行動循矩矱百家子史極意冥搜標人倫於

東國洵邈焉而寡儔蓋淵源乎家傳之詩書而挺
拔乎江左之風流者也及其棄儒而出則為齷務
之領袖為兩淮之羽儀為同人扶其正氣為流俗
化其偏私其上交則遺大投艱而克副其下交則
推心置腹而無疑道之衰也失此國良豈無友生
誰示周行卓哉吾翁百夫之防渾金璞玉蘊采韜
光乃倏焉莫予覲矣則拊心搔首而曷云能忘耶
嗚呼哀哉追憶生平孰能尊祖親親修祠葺墓如
翁之孝而敬耶孰能賦性忠良不矜苛察如翁之
誠而正乎孰能愛質樸惡紛華輕財好義如翁之
俠而任乎孰能醞釀經史書法詩篇如翁之雅而

韻乎嗚呼哀哉維翁生之稟厚歷壽考而不衰雖
宿疾之間作猶冀登夫期頤夫孰知翁已無意於
人間也奄一去而莫予追嗚呼哀哉自前月之聞
翁訃也心忡忡而若悸夜不寐而數起紛同輩以
訊予淚滂沱而如雨念夫人之有生雖百齡其必
已惟孝子光前慈孫繩祖雖富貴壽考之人未必
如翁之備美也况翁德業照世輝光比古昔之賢
哲合史策之流芳是固全而生之全而成之竟全
而歸之者也安得以人世悲酸之態紊我翁之慨
慷乎嗚呼哀哉尚

饗

維

康熙五十五年歲次丙申四月庚寅朔越宜祀之
辰年家眷弟張文英吳徵誥樊庶張韜年家眷教
弟喬國楨李篤祐年家眷教小弟吳家瑜汪輔仁
年家眷晚弟王文樞年家眷晚生江世棟張師孔
周士裕吳徵讚雷序第葉震負履祥蕭日新卞澍
閔長樂吳柯許彪鄭存周百男負履坦程煒高允
基吳曾壽謹以瓣香束帛清酌庶品之儀致祭於
皇清誥封光祿大夫內閣中書加十二級景翁項老年
太翁先生之靈而言曰嗚呼天下之理本固者枝
必茂實厚者流斯深是以龍門之桐干霄漢以直

上故能棲威鳳而集祥禽泰山之松枝糾結而榦
夭矯故能產紫芝而長神苓凡物皆然況於人道
之大如我太翁者詎不信而可徵我太翁稟五行
之秀氣漱六藝之芳菁毓神奇於黃山白岳肯堂
構於邗水蕪城孝友敦睦世業雲興殊才絕俗固
已動四海而冠八紘不言而備四時之氣謙吉而
獲六爻之貞溫溫恭人望之如泰山北斗瞻之如
景星慶雲其見之行事又如和風旭日處陽谷而
與物皆春至於淹貫博通馳名鄉國繼而經理鹽
政一切利弊洞如觀火及默排大難靜決大疑人
莫不重季心之諾而高魯連之名履豐席厚好善

樂施美績難以具陳宗族鄉黨沐其惠者事難悉
數即若里中宗祠厚值重新增築石堤俾族人永
絕水患更創義田廣為贍給復量材任事多方造
就各有成立其銳志嚮學者歲資其膏火每省試
輒稅廣廈設供頓以待之用是獲薦者屢屢竊惟
陰行之多善知明德之惟馨卜嘉祥之駢集知天
道之常伸是以賢哲挺生成能析圭擔爵貴

鳳誥而降龍綸孫曾秀發濟濟多士蟬聯鵲起輝映一
堂而我太翁躋人生之上壽友偕佺而享遐齡况
乎德超今古名留金石被天壤而弗泯亦可長嘯
於絳霄玉殿而逍遙於紫旻獨是予等景型高山

歎歲星之失曜悲人琴之俱湮敢述縷言以代生
芻之獻不禁夫涕泗之交零尚

饗

維

康熙五十五年歲次丙申四月庚寅朔越祭日壬
辰年家眷弟汪光元高元鼎盧琮程汝麟郭來泰
劉世芬王自新劉鎔陳世延年家眷晚生黃以祚
蕭暘吳文進劉可大高文玩沈國疇葛弘文史揖
汪德齡汪鴻儒年家眷同學姪郭元鈺年家眷晚
學生汪元蔭謹以辦香束帛庶品之儀致祭於
皇清誥封光祿大夫內閣中書加十二級景翁項老年
臺老先生之靈而言曰嗚呼瓊樹西靡明星夜晦
哲人云亡儀型不再祗益咨嗟誰聆馨歎搦管陳
詞懷當以慨緬維我公系原於周浴及唐宋代有

名沉後先濟美食德先疇世德不墜家聲永休逮
至我公幼而穎異強記博聞心通默識學富兩京
文成滿笥允矣偉才名馳累試情深逮養不事賢
科爰止吾郡託迹鹽齏甘旨弗缺融融以和事生
事死孝行足多碩畫英姿遇事克任果決能謀老
成垂訓品重名卿友誼投分喜動

天顏賚子顧問修築塋墓篤意本源伐石樹碣昭示子
孫興復祠饗以志不誼表揚潛德疊沛

綸恩友愛性生以恭以讓就濕推乾墳麓迭唱至於孤
貧咸沾君既死喪婚姻經營曲當義方有訓善厥
貽謀長君清要供職金甌次君分郡清慎無求機

雲著譽花萼名樓嗚呼我公美不勝述可頌可歌
有典有則誰期天上玉樓乃成倏召修文遂赴上
清神理茫然瞻望闐若里閭悲思親黨震愕我輩
何堪中心怛怛薰葭之誼桑梓之情用獻哀悃以
竭微忱醴酒溪蔬來格來歆尚

饗

維

康熙五十五年歲次丙申四月庚寅朔越祭日壬
辰年家眷同學晚生閻溶卞枚姚均劉永芳李鈺
閻澎陳憲繆松周彭年孫九夏李鏞朱廷選閻潮
生王京曹自省繆天麟李鐸朱紱徐瑤文陳弘錦
周毓英閻天衢徐傳徐永芳陳國緯何至遜何至
明卞之璠卞之琰藍棕卞王國楨張漢文陳崇素
呂大呂葉蓁繆夢傳張弼陳國錢世名卞文煜等
謹以瓣香束帛清酌庶饗之儀致祭於

皇清誥封光祿大夫內閣中書加十二級景翁項老年
臺於先生之靈而言曰嗚呼生寄死歸賢者不免

隙駟朝露昔人所悲蓋閱世期於永年植躬尚乎
迪德苟萬善其無虧雖九原亦何憾惟翁岐嶷天
授慈孝性成代有簪纓之美羣欽閱閱之高醴泉
芝艸獨有根源霽月光風方其懷抱慕高蹤而焚
券市義如馮計族黨以授糈置田師范衣裳獨古
不效蟬蛸勤儉無華常思蟋蟀况復年同絳縣壽
逾古稀形圖繪即像神仙列耆英儼如洛社三多
衍慶大德固膺天眷五福齊臻群心實欽人瑞庭
前玉樹齊芳階下芝蘭並秀龍馬精神皎皎出塵
埃之外松筠氣質亭亭立天地之中奈何一抱微
疴遽爾溘先朝露本非龍蛇之歲誰教賢哲之亡
德是好公論僉同竚聽疊至之

白鹿真人奚有返魂之術青牛道士難求續命之
方嗚呼翁生為天下之善士沒為宇內之名人懿
德是好公論僉同竚聽疊至之
綸音行見表章於國史溶等素欽懿範夙仰耿光美不
勝書第統括於齒德兼優詞不盡意惟痛哭乎典
型何有嗚呼生芻成束不捧介壽之觴楚些作歌
仰達降庭之聽尚

饗

祭輓彙錄卷八



